



Ursina e Ricardo Thomann da Seglias. FOTO M. HUONDER-JENNY

«Dunas a tgatscha»

■ (anr/bt) Mintga dus ons â liac l'exposiziun par catschadurs, pastgaders a tiradurs «Passiun». Uon â quella liac digls 8 antoc'igls 10 da favrer an la halla digl martgieu da Cuira. A caschùn da quell'exposiziun vean ear musso igl film documentar par grànda part rumantsch da Menga Huonder-Jenny «Dunnas a chatscha». El vean musso mintgame igl vendergis digls 8 a la sonda digls 9 da favrer a las uras 15.00 a cuza 25 minutas. La reschissura Huonder-Jenny e preschainta a dat egn curt antruvidamaint avànt las rapreschantaziùns. A la fegn da quellas gli pon ign far dumondas. Igl sieus film documentar tematisescha la situaziun da catschaduras. «Dunas den

stgafir veta a betg destruir veta.» Tanor que maletg tradiziunal fissan dunas ca van a tgatscha antretschadas an cuntradiziùns betga schlieablas. Igl film da Huonder-Jenny mussa anzatge oter. Ella acumpogna quater catschaduras grischùnas nànd a tgatscha. Ign veza ellas ear ad egn tir da tgatscha a Cuvlignas (Küblis), amiez la grànda fula da colegas masculins, igl settember nànd a la tgatscha da muntanealas, tgavriels, tschervs a chamutschs – dantant ear a tgea tier lur famiglias. Quater dunas diferaintas raquantan a moda impressiunànta tge impurtànta ca la tgatscha vegi an lur veta. Daple infurmaziùns sur da l'exposiziun Passiun en da catar a passiun.ch/programm-jagd

Cuntinuaziun da la «Musica agl vitg» a Veulden

DA GIERI BATTAGLIA

■ Durànt dezenis organisavan Gisula ad Angelo Tscharner zund varius concerts d'unviern an lur amparnevla stiva. Quels vagnevan stimos fetg tant digls indigens sco ear digls giasts. Quella retscha da concerts vean ussa par furtuna cuntinuada. Cumbagn an furma ampo midada. Tier las organisaturas s'oda trànter otras Sophia Windel c'â preschanto igl concept nov da quels concerts ca statan sut l'anzena da «Musica agl vitg». Dacurt en sascuntros an la Tgea Viglia dad Ursina ad Urs Rüegg egn triep interesso d'amaturs da la musica ad egn unfant ataint par tarlar là igls beals tuns digl cello, suno da Maria Barbara Barandun. Igl program cuntaneva produziùns solisticas dad ovras da Bach, Dvorak, Bridge a Diabelli. Varieu e quel vagnieu cun raquintaziùns captivàntas da praulas cuagl tema «vantira», darivàntas da la Teara Tudestga, la Bielorussia a da la Grezia. L'amparnevla serada â cato sia fegn cun prender anvesta an l'interessànta tgea digls Rüeggs, cun raschienis animos ad egn magiel vegn oferieu digl Volg a bun-tad tarschola purschida da Viola Wierland. Quella simpatica retscha d'aranschamaints e vagnida cuntinuada igls 31 da schaner cun egn'ocurenza pigls unfants an la jurta da massascha da Sophia Windel. Igl 5 da favrer â liac egn concert da percussiun an baselgia. Igl margis sera digls 12 da favrer sùna igl pianist Daniel Probst an la tgea Eggenberger ad Orademvitg 3. Tant igls giasts sco igls indigens dastgan salegrar gea ussa da que concert.



La versada cellista Maria Barbara Barandun ansemel cun la giastadra Ursina Rüegg. FOTO G. BATTAGLIA

Bùna partizipaziun agl skicross da Spleia

DA STEFAN A. MÜHLEMANN

■ Passantar igl suaintermezgi giu-jànd cun la consola da giois? Na, an measeanda passada àn 73 unfànts a giuvenils musso c'igl passlùng segi par els ple impurtànt: Els àn fatg part digl tradiziunal skicross da Spleia. Da beal'ora, mobagn d'egna bischa frestga, àn igls partizipànts scuntro egn pista preparada da maniera parfetga, cumbagn cun fineztgas tecnicas. Las passlùnghistas ad igls passlùnghists darivavan betga me da Valragn: Blears earan vagnieus cun lur clubs se da Cuira, da Schons a da la Mesolcina, singuls parfegn se da la Bassa. An la tecnica classica àgl do partenza singula. Igl ple giuvenis àn gieu d'absolver egn runda da var 1,4 km, igls ple vigls antoca tres geadas egn runda da var 1,7 km lungheztga. I àn gieu da surmuntar sempels impedimaints ca pretendan tutegna bün anschegn sen quels skis stretgs. Betga me igl stil classic ad igl tains cuntanschieu c'àn dezidieu la cursa, mobagn ear la part digl slalom noua c'igl e

sto da midar vial a parfegn far egn stier-tessa. Igl impedimaint ple popular e bagn sto igl «pedalo», egn retscha dad undas. Par dumignear quellas àl igl ski dretg respectivameing igl saniester da surmuntar la cunterunda. Igl skicross da Spleia e parquegl adigna egn'evenimaint particular c'â liac antainfer la seria da cursas agl rom da la Cupa Cargo Grischa, organiso digl Club da skis da Spleia a da la Zela da trenamaint nordic digl Grischùn central, sustanieu da SportGrischun a digl Turissem Viamala. A Spleia àn proximameing liac ulteriurs evenimaints sportivs publics, tuts organisos digl Club da skis Tambo Spleia, da cuminànta cun l'Uniun da Sport Tumpriv ad igl Sci Club San Bernardino: Igl biatlon-sprint da Spleia da sonda digls 2 da marz ad igl slalom paralel ski alpin da Spleia da sonda digls 9 da marz. Las anunztgas en da drizar a sctambospluegen.ch/enroll La rangaziun digl skicross digl 30 da schaner e da vaser a: sctambospluegen.ch/ranglisten



Igl trio digls victurs S14: Fabian Samapio (2.), Robin Bläsi (1.) a Nando Bissig (3.) FOTOS ST. MÜHLEMANN



Las victuras S10 cun Anielle Marti (2.), Anoushka Vanek (1.) a Larina Zwahlen (3.)



Mattia Dasoli da l'Uniun da Sport Tumpriv saconzentrescha par passar aschi dabot sco pussevel igl «pedalo».



Igl victurs digls matatschs S10 cun Matti Baselgia (2.), Fadri Steiner (1.) a Duri Calonder (3.)